

TOKIKO GOBERNU BATZARRAK 2013KO APIRILAREN 19EN EGINIKO OHIKO BILKURARI DAGOKION AKTA

Errenteriako udaletxean, 2013ko apirilaren 19ko goizeko 08:00ak zirela, lehenengo deialdian eta Julen Mendoza Perez alkate jaunaren (O.E. BILDU) esanetara, ondoko zinegotziak elkartu dira:

- Luis M^a Diez Gabilondo.
- Jon Txasko Orgilles.
- Miren Alazne Korta Zulaika.
- Iruna Balenciaga Arrese.
- Garazi López de Echezarreta Auzmendi.(Denak O.E. BILDU taldekoak)
- Jose Manuel Ferradas Freijo (EE)

Bertan dago eta egintza fedatu du Begoña Bueno Barranco idazkariak.

1. Gobernu Batzarrak 2013ko martxoaren 15ean eginiko ohiko aktaren irakurketa eta onespena, bidezkoa bada.

Idazkariak 2013ko martxoaren 15ean eginiko ohiko bilkurari dagokion akta irakurri ondoren.

Tokiko Gobernu Batzarrak, aho batez,

E R A B A K I D U

Onartzea 2013ko martxoaren 15ean eginiko ohiko bilkurari dagokion akta.

2. Proposamena: kultur dinamizatzaile lanpostua, zerbitzu-eginkizunen bidez, denboraldi batez betetzeko deialdi murriztua. Deialdiaren oinarriak onartzeko proposamena.

2013ko ekitaldirako aurrekontua onartzeko garaian, Kulturako teknikariak 2012ko urriaren 12an txostena egin zuen. Bertan, egungo Kultura departamentuaren eta berari atxikiriko zerbitzuen egoerari buruzko azterketa bat egiteaz gain, hainbat aldaketa edota departamentuari atxikiriko lanpostuak gehitzeko proposamenak egin zituen.

Horien artean departamentuan bi langile berri sartzeko proposamena egiten zuen, hain zuzen: Kultura animatzaile-dinamizatzaile bat, C1 taldean sailkatua, lanaldi osoarekin. Eta programazioan laguntzeko teknikari bat, A2 taldean sailkatua eta % 70ko lanaldiarekin.

Horregatik, bi figura berri hauek sartu ziren ekitaldi honetarako onarturiko aurrekontuan.

Aipatutako kultur dinamizatzaile lanpostua nola bete aztertzeko xedez, kontratazio-mahai bat osatu zen 2013-03-13an eta barne-deialdi baten bidez egiteko akordioa hartu zen, lanpostuen baldintzak betetzen dituzten eta C1 edo C2 sailkapen taldean dauden udal karrerako funtzionario eta langile finko guztien artean.

Deialdiaren oinarriak langileen ordezkariekin negoziatu dira, eta akordioa lortu da. Dena den, LABeko sail sindikalaren arabera, lanpostu horren maila erdi mailako teknikariarena izan beharko litzateke.

Jakinaren gainean egonik, Alkatetzak 2011ko ekainaren 27ko Dekretuan erabakitako eskuordetzen baitan, erabaki hau hartzea Tokiko Gobernu Batzarraren eskumena dela.

Udal kontu-hartzaileak gai honi buruzko txostena egin zuen 2013ko apirilaren 17an.

Giza Baliabide Saileko ordezkariaren proposamena ikusitakoan.

Tokiko Gobernu Batzarrak, aho batez,

ERABAKI DU

1. Deialdi murriztua egitea kultur dinamizatzaile lanpostua, zerbitzu-eginkizunen bidez, denboraldi batez betetzeko.
2. Onartzea deialdia arautuko duten oinarriak, espediente honetan jasota daudenak.
3. Gastua baimentzea aurrekontuaren I. kapituluaren gain, hain zuzen aurrekontuan diru-izendapena duelako.
4. Iragarkiak argitaratzea Udaleko iragarki-oholean eta udal intraneten.
5. Lanpostuak 19. mailako lanpostu-osagarria izango du eta 19.368,16 euroko berariazko osagarria, non lana egin behar duen baldintzak ordaintzen baitira.

3.- Errenteriako Udalak dituen eraikinetarako gas naturalaren hornidura esleitzea.

Funtzio Publikoko foru diputatuak 2012ko azaroaren 27ko foru aginduaren bitartez, erabaki zen ENDESA ENERGIA, S.A.U. (IFZ.:A81948077) enpresarekin Foru Kontratazioen Zentralaren bidez X12013 zenbakiko espedientea "Foru Kontratazioen Zentralaren bitartez "Gas naturala hornitzeko esparru akordioa" burutzea.

Errenteriako Udala Foru Kontratazio Zentralak tramitatutako espediente honi atxikia dagoen erakundea den aldetik, 2012ko otsailaren 28ko nire agindupeko Ebazpenaren bidez, 2011ko otsailaren 22ko 3/2011 Foru Dekretuaren 6. artikulua araberak, Esparru Akordiotik eratorritako kontratua esleitzea, formalizatzea eta gastua baimentzea Udalari dagokio.

Hori dela eta, Sektore Publikoetako Kontratuen 30/2007 Legearen Testu Bateginaren 198. artikuluari jarraituz, bidezkoa da eratorritako kontratua ENDESA ENERGIA, S.A.U. enpresari esleitzea, sinatutako esparru akordioaren ondorioetan ezarritako baldintzetan.

Alkateak proposatuta.

Tokiko Gobernu Batzarrak, aho batez,

ERABAKI DU

LEHENENGO.- Esleitzea "Foru Kontratazio Zentralaren bitartez gas naturala hornitzeko Esparru Akordiotik" eratorritako kontratua (X12013) NOROIL, S.A. enpresari (IFZ.:A81948077), beti ere esparru akordioa burutzea erabaki den baldintzapean.

BIGARREN.- Baimentzea eta xedatzea aurtengo ekitaldiari dagokion gastua, Udal kontu-hartzaileak adierazitakoaren arabera.

HIRUGARREN.- ESKATZEA ENDESA ENERGIA, S.A.U.-ri, hamar (10) laneguneko epean, jasotzen duenetik kontatzen hasita, 8.362 euroko behin betiko bermea jarri dezan.

Eta aztertu beharreko gai gehiagorik ez zegoenez, presidenteak bilkura amaitutzat eman du egun bereko 08:20 zirela. Eta aztertutakoa eta erabakitakoa jasota gera dadin Akta hau egin dut Erkidego Autonomoko paper ofizialean, _____zenbakitik _____ra, eta nirekin batera Alkateak sinatu du. Egiaztatzen dut.